

# 2 Timoti

Yesu wel wiak kutömweri sēen wē krismaki 36 pōta ök won sēen Pool kaalak wii kaatak wē Timotiin epwer retēng ē mena. Pool pi pimtē wel wiipna akunet temanōm yesēn kōn weswes ēēē Timoti pim Epesas kak ingre mor saurō ngarangk ēēpnaal ngan rē mena.

## Pöt epël wia.

Ngön ngēs rēaut 1:1-2

Yoöre ērēpre wa korkor ngönöt 1:3–2:13

Weteteere pepanōm ngönöt 2:14–4:5

Pool pimtē ngōnte 4:6-18

Ngön mēēt 4:19-22

---

**1** <sup>1-2</sup>O Timoti nem ru ulöpöököp ne Pool Anutuuk Yesu Kristoē ngön yaaō omēn sumēak neulēak tiarim wēwēet Yesu Kristooring yal mangkēn nimpnaat kosang wesak niia pōten ök niamēak wes nemēaupök pep epwer retēng ē yaningk.

Anutu Pepere tiarim Aköp Yesu Kristo piarpim komre kolapre ya ngēsre mayaap pöt ningkēn nim naē wiaap.

## Tiar ngönēntaan ēō ēēngan

<sup>3</sup>Nem ēere peparōa eima pōl neenta lupmer utpetat won wiaan kengkēnring wē Anutuun inēēn elmēeim wē. Pēl ēēē nimēēn yak kēt ēl epotē Anutuun kimang maimeē yoöre ērēp maim wē. <sup>4</sup>Ne sēp yaniwasēn nim neen yakōm ēēn ing ēan pōten kōn wieē ērēpērēp kēsang pan ēēmaak yak niin itaampaaten kent yaē. <sup>5</sup>Ne nim kōn wi kosang pan weseim wēēn pipten kōn wia. Kōn wi kosang ke pil pipēt nim ōng ēap Loisre ēlēp Yunis piarpim eimautak niinta tapēl yaēn pēl kōn yaniwi. <sup>6</sup>Pōtaanök nim kōnō it nganga niwesak epël niamaan. Ngaan nem moresiar nim kepōnōök yaniwiin Anutuuk welakōt elniin ngōnēn ya mēmpēak weēre kosang waup. Pōtaanök weēre kosang pōta kēēt ngarangk ēak ulōl wasum. <sup>7</sup>Nim elnia pōten kōn wieē epël kōn wiim. Anutu pim Pul tiar yaningk pōök kas ēēpenēak naalniin weēre kosang ēere lup sant ēere tiarimtok tiarimtēn ngarangk ē pēl ēēpenēak yaalni. Pōtaanök weēre kosang waō pōta kēēt ngarangk ēak ulōl wasum.

<sup>8</sup>Ni tiarim Aköpë ngönënte ök amëëtaan ëö ëëngan. Pël ëäk ne pim yaat yamëngkën wii kaatak neulëaup neenta ëö ëëngan. Ni Anutuu naëaan weëre kosang wak nem yaaul ngönëntaan këlangön kat yawiem kön wiin pangk ëëp. <sup>9</sup>Anutu pim tiar utpetetakaan niwak wotpil öpenëak yaö niia pöt tiarim ompyaö nentaan won. Ngaanëer pan Anutu pi yang epër won wiaan Yesu Kristook tiar ompyaö niwasëpnaat pël kön wia pötak komre kolap elnia. <sup>10</sup>Pim komre kolap elnia pötak peene tiarim utpetetakaan niwaup, Yesu Kristo, yaaröön tekeri yes. Kristo pi weleta weëre kosangöt wa olëak pim ngön ompyautak wëwë kosang wiakaim wiaapna pöt war wes yaningk. <sup>11</sup>Pël ëën Anutuuk ne pim ngön yaaö omën sak ngön ompyaö pöt aöre rë moulö pël ëëmëak neulëaup. <sup>12</sup>Pël äaut pötaanök ne këemre këlangönring wëaup. Pël ëëë pöten ëö naën nem kön wi kosang yewesau Anutu pöpön kön selap naën yaaup pi weëre kosangringëpök nem ya yamëngkautre wëwëet ngarangk elnëëpënëak yemangk pöt pout ngarangk ëäk wëën akun kaöäö temanöm sëpnaat. <sup>13</sup>Ngön yaap nem këmtakaan ök yeniak pipta ököök ëëm. Ni Yesu Kristooring yal menak wë ngön pipët piin kön wi kosang wasööre lupmerök sant mowasö pël ëëmëën yeniak pipël ëëm. <sup>14</sup>Ni Anutuuk omën ompyaö ngarangk ëëmëak nina pipët ompyaö wesak ngarangk ëëm. Ngëëngk Pul tiarim lupmeri wia pöök kaamök elniaan ya pipët mëmp. <sup>15</sup>Ni ëwat wëën. Esia yangerak ngönën omën pourö ne sëp newesaut. Pitëm naëaan Piselasre Emosenis piaripta. <sup>16</sup>Aköp pi Onesiporas pim öngre ruuröen yaköm elmëëp. Pitëm pepapök ne wii kaatak wëën kaaö naalnëën akun kësang nem naë wais ya kë neweseimaup. <sup>17</sup>Pi Rom kak wais neen ap weseim wiak nokoiraut. <sup>18</sup>Aköpök kön wiin pangk ëën akun kaöäöök yaköm elmëëp. Pi Epesas kak nemëën inëën ya kësang mëneimaut. Pöten iteneimaup niinta ëwat wëën.

### Poolök Timotiin Yesu Kristoë nga omën sëpënëak mëä

**2** <sup>1</sup>Nem ruup ni, tiar Yesu Kristooring yal menak wëën komre kolap yaningk pötak weëre kosang sak öm. <sup>2</sup>Pël ëäk omnaröa itöök nem ngönën ök niaan kat wia pipot nuukta tapël omën naröen kön wiin ya ompyaö mëmpnaarö pël ëën pöt pitën maan omën muntaröen ök map.

<sup>3</sup>Ni Yesu Kristo pim nga omën ompyaö namp pël sak tenring këemre këlangönë rangk öm. <sup>4</sup>Ne nim ömëel pöten kön wiimëek yak ngön nokoliit ök niamaan kat wi. Omën namp kööre tokörö il wasëpënëak nga yaatak wë pi ya muntat namëngkën yaaup. Ngaröa kaöapök pim yaaten itenak kent ëëpënëak nga ya kopëtet ompyaö wesak mëmpnaat. <sup>5</sup>Ën namp pi omën muntarö il mowasëpënëak ngaal witwit yeem ngasam pöta ngön kosangta ënëm naën ëëpna pöp këët naön ëëpnaap. <sup>6</sup>Ën namp pi ya lupöök akun poutë ya kaö mëneim öpna pöp puuk wet réak ya lupöökkan kaömp këët öpnaap. <sup>7</sup>Ngön pipot ingre mor saurö tiarim wëwëeten

ya. Aköpök kön koir ningkën nem ngön ök yeniak pipotë këetön ewat sumëet. Pötaanök kön wiaam.

<sup>8</sup>Ni Yesu Kristoon kön wiaam. Pi omën omp ak Tewit pim äapök weletakaan wal äaup ngön pöt ngönentak ök ni yeë pöt. <sup>9</sup>Ne ngön ompyaö pipot ök yaan omnarök nem ngönten kaaö ëen utpet yaauroen yaalmë pöl këemre këlangön ke nentere nent kat yenewi. Pit wii yenetë. Pël äautak Anutu pim ngönte wii natëen yaë. <sup>10</sup>Pötaanök ne Anutuu yaö wesaurö pitëmëen këemre këlangön epot kat yawi. Pit Yesu Kristook utpetetakaan moön Anutuu ewaatak wakaim öpënëak këlangön kat yawi. <sup>11</sup>Ngön epël wia epët yaap.

“Tiar pim weletak yal menan pöt wëwëetakta yal mempnaat.

<sup>12</sup>Tiar këlangön kat yawiem weë ngentiipena pöt piiring ngarangk sëpnaat.

Tiar pi yak mowasëpna pöt puukta tiar yak niwasëpnaat.

<sup>13</sup>Tiarim ngön kosangët wiap sëpna pöt pim ngön kosangët kosang sak wiaapnaat.

Pi nalre nal naën yaaup.”

#### **Ya omën namp Anutuuk itaangkën ompyaö yaë pöta ngönte**

<sup>14</sup>Ni ngön epët ngölöp wesak Anutuu ëöetak omnaröen mëak pit ngön utpetatëen nga elepan pël mam. Pël yaë piptak kaamök naalmëen ngön utpet pötök pöt kat yawiaurö utpet yemowas. <sup>15</sup>Anutuuk niin kön wiin kë sëpnaataan weë ngentiak yaat mëmp. Pël yeem ngön këët wotpil tekeri wesak maim wëen omën ëöaat nim rangk nawisën ëëpnaat. <sup>16</sup>Ngön pas kë won Anutuu kent naën pipot apan. Pipotök utpetatë kanöök wes mëen Anutuun kasëng mempanëen. <sup>17</sup>Kaar pipot ëmpöl kaöatë yaë pöl ulöl sak utpet yewas. Omën ke pil yaauroakaan naar Aimeniasre Pailitas. <sup>18</sup>Piarip irikor ëak ngön këët kasëng menak ënëmak weletakaan wal ëëpnaat ya pöt yok oröa pël kaar aimeë omën muntaröa kön wi kosang yewasaut utpet weseim wë. <sup>19</sup>Pël yaatak Anutuuk pim ingre morörö tiar ka wap ket ëak wesirën taintaë taua. Wap pöta möönöök ngön epël wia. “Aköp pi pim omnaröen ewat wë.” Pël ëak munt nent epël wia. “Omën Aköpön, ‘Yaap pi tiarim Aköp,’ pël maimëë pim yapinte wak yaauro pit utpetat kasëng mamp.”

<sup>20</sup>Omën omnant kësang wieëaupë ka kaöetak kelön nant omën sum kësangët koolre siluwa pötök ket ëere këraare yangatök ket ë pël äaut wia. Nant ya kaöatë yaut, nant pasutë yaut pël ëak wia. <sup>21</sup>Namp pi omën pas pöt kasëng menak pim lupmer kölam wasën pöt pi kelön ya kaöatë pötë ök sëpnaat. Pël ëen Ka Pepapök piin kön wiin ompyaö ëen peram mowasën pi yaap Ka Pepapëen ya ompyaö ke nentere nent mëmpnaat.

<sup>22</sup>Timoti ni omp ulwasöröa kentre kaur yaaut sëp mowesak öm. Pël ëak omën lup kölamring wë Anutuun kaamök elmëëpënëak maim

wëauröaring wotpil wëere kön wi kosang mowasö, lup sant elmëere mayaaptaring wë pël eëmëen weë ngentiim. <sup>23</sup>Ni köpël ngön utpet pipot kasëng mamp. Pipotök nga koir yaë pöten ewat wëen. <sup>24</sup>Aköpë inëen yaaö nampök ngaal witwit ngön epan. Pi omën pourö ngötre kar elmëimeë ompyaö wesak ngönën ök maim öp. Pël yaëen nampök piin utpet yaalmëen pöt ya sangën elmëëpan. <sup>25</sup>Pël ëak omën pim ngön wa olë yaaurö pitën wiapre kor elmëak pitëm könöt wotpil mowasëp. Pël ëen pit Anutuuk kaamök elmëen lup kaip tiak ngön këet ewat sëpën sa. <sup>26</sup>Pël ëak pitëm lupöt kan tëen ngaanëer Setenök pim ngön ngaarëk öpënëak kalaapö mowiin wak wakaima pörekaan ent ë olëak ompyaö sëpnaat.

### Akun kaöaö temanöm yesën wa irikor kësang orööpnaat

**3** <sup>1</sup>Ni epël kön wiaam. Akun kaöaö temanöm yesën könöm ke nentere nent orööpnaat. Pöt epot. <sup>2</sup>Omnarö pitëmtën kent ëen keimön ëëpnaat, monatön kentre kaur ëëpnaat, pitëmtën wak isak apnaat, ieping ëëpnaat, Anutuun ökre was apnaat, pitëm ëlre peparöa ngönöt wa olapnaat, omnant mangkën yoöre ërëp nemaan ëëpnaat, Anutuun ngëëngk nemowasën ëëpnaat, <sup>3</sup>omën pitring irëauröenta ngötre kar naën ëëpnaat, omnaröak mayaap elmëëpënëak yaëen kangiir nga elmëëpnaat, omnaröen ökre was apnaat, pitëmtök pitëmtë koröpötön ngarangk naën ëëpnaat, kentre imënoröa yaë pöl ëëpnaat, omën ompyaö yaautön kööre tok ëëpnaat, <sup>4</sup>pitëm karuröen morök elmëak kööre toköröa moresi moulmëëpnaat, teënt pan köntak pitëm kön ëngk ma e pötë ënëm ëëpnaat, pitëmtök omën kaöarö pël kaar apnaat, koröpöökë omnantön kent yeem Anutuun kent naën ëëpnaat. <sup>5</sup>Pël yeem pit koröpöök Anutuu ënëm yaaö kaarkaer sak wë Anutu kasëng menak öpnaat. Ni omën ke pilörö kasëng mamp. <sup>6</sup>Pitëm naëaan narö ëlëëp ka nantë së ilëak öng kön wonöröen ngön kaar ke nentere nent mëak pitëm ngönën kaar pötë ënëm ëëpënëak morök yaalmë. Öng pörö pitëm saunatë könömöt wetak wë kön selap wëaurö kentre kaur ke nentere nent pötök wer moön ënëm yaaurö. <sup>7</sup>Pit ket ël epotë ngön kat wiak kön ya mëneimeë ngön këeta songönte ewat nasën yaaurö. <sup>8</sup>Omën öngörö morök yaalmëa pörö ngaan Sanisre Sampris piarpim Moses pim ngönten kööre tok elmëa pöta ök ngön këëtaan kööre tok yaaurö. Pitëm könöt utpet yaaurö yak kön wi kosang yewesaut kaëngk yaaurö. <sup>9</sup>Pitëm omnant yaautë këet kaö naarööpan. Sanisre Sampris piarpim ëa pöl köpël yaauta këet tekeri sëen omën pourö itaampnaat.

### Weëre kosang taueë Anutuu ngönta ënëm yaauta ngönte

<sup>10</sup>Ni neering yesaup nem ngönën ök yamëëaöre kan yaaö, omnant yaaö poutë songöntere Anutuun kön wi kosang yewesaöre ya wiap yaaö, lup sant yaaöre këere ngaatë rangk wë, <sup>11</sup>omnaröak utpetat kësang yaalnëaöre këlangön kat

yawiaö pötön ewat wëen Antiokre Aikoniamre Listra ka pötë së wë këlangön kaö kat wieim wëen Aköpök utpet pötë öngpökaan ent ë neulëaut pötën ewat wëen. <sup>12</sup>Omën narö Yesu Kristook yal menak Anutuu ngöntak öpna piporo kööre toköröak utpet mowasëpnaat. <sup>13</sup>Ën omën utpet kaar yaauröak omnaröen morök yemaan Setenökta pitën morök tapël maan utpet panë sëpnaat.

<sup>14</sup>Ni pöt, ngön kë kat wiak kön wi kosang wesang pipot taintaë wak öm. Ni ten ngön pipot rë niulauröen ewat wëen. <sup>15</sup>Nimtënta ewat wëen. Nim kotuukaan ngëengk ngönën pepewer sangk kelak kat wieimaup yak pötak kön ompyaut ningkën Yesu Kristoon kön wi kosang wasën Anutuuk utpetetakaan niöpnaap. <sup>16</sup>Ngönën pep pipot pout Anutu pimtë Pulöökë kaamöktak oröaut. Pötaanök ngön pipotök ewat ninak tiarimtë utpetatön pet yaalni. Pël ëak tiarim wëwëat ompyaö niwesak wotpil öpena pöt rë yanuul. <sup>17</sup>Kopëta niwasën Anutuu omën kë panë sak ya ompyaö ke nentere nent mëmpenëak ngönën pep pöt oröa.

#### Poolök Timotiin Anutuu ngön këet kosang wesak ök mapënëak mëea

**4** <sup>1</sup>Ne Anutuu eöetakre Yesu Kristo omën wel wiaare öp wëaurö tiarim ngönte ë pet irëpnaapë eöetak pim akun kaöaöök wais wa ngaöök nimëëpna pötaan kosang wesak epël niamaan kat wiim. <sup>2</sup>Anutuu ngönte ök mëak omën pötaan kent yaauröere kaaö yaaö pouröen wiap elmëak kosang wesak ök mam. Pël ëen ngön pötak elmëen pitëm lupöt it nganga sëp. Pitëm utpetatön nga maan lup kaip tiip. Konöt kosang mowasën Anutuu kanöök sëp. Pël yaëen kët ël epotë wiap elmëak këëkë wesak rë mouleim öm. <sup>3</sup>Ënëmak akun nent temanöm sëen omnarö wotpil ngönten kaaö ëak pitëmtë kentötë ënëm eimeë ngönën kaaröt kat wiipënëak yeem pëel maan rë yemoula ke nampre nampörö wais rë mouleim öpnaat. <sup>4</sup>Pël ëen pit ngön këet kasëng menak ëlar ngön pöt kat wieim öpnaat. <sup>5</sup>Ni pöt, kët ël epotë kön tektektaring wë këemre këlangönë rangk öm. Pël ëëë omnaröen ngönën ök maim öm. Nim omnarö kaamök ëak ngönën ök yemaan ya pöt panë wesak mëmpeim öm.

#### Pool pi ya pet irëpënëak mëea

<sup>6</sup>Wain iit Anutuun kiri yaalmë pöl nem iit lë olemëak yeë. Nem wëwë epët sëp wasuma akunet temanöm yes. <sup>7</sup>Ne nem yaat wëë ngentiak mëneimaut. Nem yaat mëmpö wais pet ir yoolak. Kan yaö neea pöök mësaö wais yaö neeaurek yaarö. Nem kön wi kosang yewesaut wil këlok naën. <sup>8</sup>Pël ëen peene pöt kutömweri ul ë rangiaut, sum kësangring omën wotpilöröaan yaö ëa pöt nemëen äaut akun kaöaöök Omp Aköp, ngön ë pet yairä wotpilëp puuk nampnaat. Pöt nemënt pëen won, pim orööpna akuneten kent ëak kor wakaimaurö pitta mampnaat.

#### Ngön mëet

<sup>9</sup>Peene teëntom nem naë waisum. <sup>10</sup>Timas pi yangerakë omnantön kentre kaur ëak ne sëp newesak Tesalonaika kakë sa. Pël ëen Kresen piita

Kalesia yangerakë yesën Taitasta Talmesia yangerakë sa. <sup>11</sup>Pël ëën Luk pimënt tenip wë. Pötaanök ni Maak koirak arip waiseë. Pi yok pangk ya kaamök elnëëpnaap. <sup>12</sup>Tikikas pöpökëër nook wes mëën Epesas kakël sa. <sup>13</sup>Nim waisumë pötak nem ulpëën waliip Troas kak Kapas pim kaatak wiaan pöp wak waisum. Pël ëäk pep pepatring ket ëautre imën koröpöök ket ëaö pipotta wak waisum. Ne pep imën koröpöök ket ëaö pipotön kent pan yaë.

<sup>14</sup>Ainötök omnant ket yaaup Alesanta pi utpet kaö elnëaut. Pötaanök Aköpök kangut mampnaat. <sup>15</sup>Niinta omën pöpön ngarangk këëkë ëëm. Pi kosang ëäk tenim ngönöt wa olëaup.

<sup>16</sup>Wet rëak nem ngön yaatak neulëa pötak omën namp ne kaamök naalnëën, won pan. Omën pourö ne sëp newesa. Aköpök pitëm korar elnëa pöta kangut won wes moolap. <sup>17</sup>Aköp neering wë ngönën ulöl wasën köpël omnaröeta kat wi pet irëpënëak kaamök elnëak weëre kosang nenak utpet kaöatë naëaan ent ë neulëaut. <sup>18</sup>Aköp pi utpet ke nentere nenta öngpökaan newak ompyaö wesak kutömweri wa ngaöök nemëëpnaap. Tiar akun poutë pim yapinte ngaarëk wak aim öpa. Yaap.

<sup>19</sup>Ne Akuilaare pim öngöp Prisilaare Onesiporasë öngre ruurö pit pouröaan yowe yemak pël ök mam. <sup>20</sup>Erastas pi Korin kak wakaimaup. Tropimas yauman ëën Mailitas kak ent ë moulmëaut. <sup>21</sup>Kentre wap akunet temanöm sëpanëën teënt waisum.

Yupulasre Putenre Lainasre Klotiaare ingre mor eprek wëaö pourö pitta yowe yenia.

<sup>22</sup>Aköp nim könöpring öp. Pim komre kolap pöt arim naë wiaap.

[Yok pi tapët.

Ne nim pepap, Pool.]